





盛唐彙詩卷第九十六

四唐彙詩一百六十六

長安鄭振鐸

新都

吳勉學編輯

陸麐祥校訂

五言排律

贈答

奉漢中王手札

杜甫

國有乾坤大王今叔父尊剖符來蜀道歸蓋取  
荆門峽險通舟過江長注海奔主人留上客避  
暑得名園前後緘書報分明饌玉恩天雲浮絕



壁屋竹在華軒已覺涼宵永何看駭浪翻入期  
朱邱雪朝傍紫微垣枚乘文章老河間禮樂存  
悲秋宋玉宅失路武陵源淹泊俱崖口東西異  
石根夷音迷咫尺鬼物傍黃昏犬馬誠爲戀狐  
狸不足論從容草奏罷宿昔奉清樽

投哥舒開府翰二十韻

杜甫

今代麒麟閣何人第一功君王自神武駕馭必  
英雄開府當朝傑論兵邁古風先鋒百戰在畧  
地兩隅空青海無傳箭天山早挂弓廉頗仍走

敵魏絳已和戎每惜河湟棄新兼節制通智謀  
垂睿想出入冠諸公日月低秦樹乾坤繞漢宮  
胡人愁逐北宛馬又從東受命邊沙遠歸來御  
席同軒墀曾寵鶴畋獵舊非熊茅土加名數山  
河誓始終策行遺戰伐契合動昭融勲業青冥  
上交親氣槩中未爲珠履客已見白頭翁壯節  
初題柱生涯獨轉蓬幾年春草歇今日暮途窮  
軍事留孫楚行間識呂蒙防身一長劍將欲倚  
崆峒



上韋左相二十韻

杜甫

鳳曆軒轅紀龍飛四十春八荒開壽域一氣轉  
洪鈞霖雨思賢佐丹青憶老臣應圖求駿馬驚  
代得騏驎沙汰江河濁調和鼎彘新韋賢初相  
漢范叔已歸秦盛業今如此傳經固絕倫豫章  
深出地滄海濶無津北斗司喉舌東方領搢紳  
持衡留藻鑑聽履上星辰獨步才超古餘波德  
照鄰聰明過管輅尺牘倒陳遵豈是池中物由  
來席上珍廟堂知至理風俗盡還淳才傑俱登

用愚蒙但隱淪長卿多病久子夏索居貧回首  
驅流俗生涯似衆人巫咸不可問鄒魯莫容身  
感激時將晚蒼茫興有神爲公歌此曲涕淚在  
衣巾

奉贈太常張卿均二十韻 杜甫

方丈三韓外崑崙萬國西建標天地闊詣絕古  
今迷氣得神仙迴恩承雨露低相門清議衆儒  
術大名齊軒冕羅天闕琳琅識介珪伶官詩必  
誦夔樂典猶稽徒筆凌鸚鵡銛鋒瑩鷓鴣友于



皆挺拔公望各端倪通籍踰青瑣亨衢照紫泥  
靈虬傳夕箭歸馬散霜蹄能事聞重譯嘉謨及  
遠黎弼諧方一展班序更何躋適越空顛躋遊  
梁竟慘悽謬知終畫虎微分是醯雞萍泛無休  
日桃陰想舊蹊吹噓人所羨騰躍事仍睽碧海  
真難涉青雲不可梯顧深慙鍛鍊才小辱提攜  
檻束哀猿巧枝驚夜鵲棲幾時陪羽獵應指釣  
璜谿

贈特進汝陽王二十二韻 杜甫

特進羣公表天人夙德升霜蹄千里駿風翻九  
霄鵬服禮求毫髮推忠忘寢興聖情常有眷朝  
退若無憑仙醴求浮蟻竒毛或賜鷹清關塵不  
染中使日相乘晚節嬉遊簡平居孝義稱自多  
親棣萼誰敢問山陵學業醇儒富辭華哲匠能  
筆飛鸞聳立章罷鳳騫騰精理通談笑忘形向  
友朋寸長堪繾綣一諾豈驕矜已忝歸曹植何  
如對李膺招要恩屢至崇重力難勝披霧初歡  
夕高秋爽氣澄樽罍臨極浦鳧雁宿張燈花月



窮遊宴炎天避鬱蒸硯寒金井水簷動玉壺冰  
瓢飲唯三徑巖棲在百層謬持蠡測海况挹酒  
如澗鴻寶寧全秘丹梯庶可陵淮王門有客終  
不媿孫登

敬贈鄭諫議十韻

杜甫

諫官非不達詩義早知名破的由來事先鋒孰  
敢爭思飄雲物外律中鬼神驚毫髮無遺恨波  
瀾獨老成野人寧得所天意薄浮生多病休儒  
服冥搜信客旌築居山縹緲旅食歲崢嶸使者

求顏闔諸公厭襴衡將期一諾重歛使寸心傾  
君見窮途哭宜憂阮步兵

贈翰林張四學士垞

杜甫

翰林逼華蓋鯨力破滄溟天上張公子宮中漢  
客星賦詩拾翠殿佐酒望雲亭紫誥仍兼綰黃  
麻似六經內分金帶赤恩與荔枝青無復隨高  
鳳空餘泣聚螢此生任春草垂老獨漂萍儻憶  
山陽會悲歌在一聽

贈韋左丞丈濟

杜甫



左轄頻虛位今年得舊儒相門韋氏在經術漢  
臣須時議歸前列天倫恨莫俱鴿原荒宿草鳳  
沼接亨衢有客雖安命衰容豈壯夫家人憂几  
杖甲子混泥塗不謂矜餘力還來謁大巫歲寒  
仍顧遇日暮且踟躕老驥思千里饑鷹待一呼  
君皆微感激亦足慰榛蕪

奉留贈集賢院崔于二學士 杜甫

昭代將垂白途窮乃叫閭氣衝星象表詞感帝  
王尊天老書題目春官驗討論倚風遺鴟路隨

水到龍門竟與蛟螭雜寧無燕雀喧青雲猶契  
閣陵厲不飛翻儒術誠難起家聲庶已存故山  
多藥物勝槩憶桃源欲整還鄉旆長懷禁掖垣  
謬稱三賦在難述二公恩

奉贈鮮于京兆二十韻 杜甫

王國稱多士賢良復幾人異才應間出爽氣必  
殊倫始見張京兆宜居漢近臣驩驩開道路雕  
鸚離風塵侯伯知何算文章實致身奮飛超等  
級容易失沈淪脫畧蟠谿釣操持郢匠斤雲霄



今已逼台袞更誰親鳳穴雛皆起龍門客又新  
義聲紛感激敗績自逡巡途遠知何向天高難  
重陳學詩猶孺子鄉賦念嘉賓不得同晁錯吁  
嗟後却詵計踈疑翰墨時過憶松筠獻納紆皇  
眷中間謁紫宸且隨諸彥集方覲薄才伸破膽  
遭前政陰謀獨秉鈞微生霑忌刻萬事益酸辛  
交合丹青地恩傾雨露辰有儒愁餓死早晚報  
平津

贈王二十四侍御契四十韻 杜甫

往往雖相見飄飄媿此身不關輕紱冕俱是避  
風塵一別星橋夜三移斗柄春敗亾非赤壁奔  
走爲黃巾子去何瀟灑余藏異隱淪書成無過  
鴈衣故有懸鶉恐懼行裝數伶俜臥疾頻曉鶯  
工迸淚秋月解傷神會面嗟鰲黑含悽話苦辛  
接輿還入楚王粲不歸秦錦里殘丹竈花谿得  
釣綸消中祗自惜晚起索誰親伏柱聞周史乘  
槎有漢臣鸚鵡鴻不易狎龍虎未宜馴客卽挂冠  
至交非傾蓋新由來意氣合直取性情真浪跡



同生死無心耻賤貧偶然存蔗芋幸各對松筠  
麤飯依他日窮愁恠此辰女長裁褐穩男大卷  
書勻滿口江如練蠶崖雪似銀名園當翠巘野  
棹沒青蘋屢喜王侯宅時邀江海人追隨不覺  
晚欵曲動彌旬但使芝蘭秀何須棟宇鄰山陽  
無俗物鄭驛正留賓出入並鞍馬光輝忝席珍  
重遊先主廟更歷少城闈石鏡通幽鬼琴臺隱  
絳脣送終惟糞土結愛獨荆榛置酒高林下觀  
碁積水濱區區甘累趼稍稍息勞筋網聚粘圓

鯽絲繁煮細葍長歌敲柳瘦小睡凭藤輪農月  
須知課田家敢忘勤浮生難去食良會惜清晨  
列國兵戈暗今王德教淳要聞除袂偷休作畫  
麒麟洗眼看輕薄虛懷任屈伸莫令膠漆地萬  
古重雷陳

贈虞十五司馬

杜甫

遠師虞秘監今喜識玄孫形象丹青逼家聲器  
宇存淒涼憐筆勢浩蕩問辭源爽氣金天豁清  
譚玉露繁佇鳴南嶽鳳欲化北溟鯤交態知浮



俗儒流不異門過逢連客位日夜倒芳樽沙岸  
風吹葉雲江月上軒百年嗟已半四座敢辭喧  
書籍終相與青山隔故園

奉贈盧五丈參謀琚

杜甫

恭惟同自出妙選異高標入幕知孫楚披襟得  
鄭僑丈人藉才地門閤冠雲霄老矣逢迎拙相  
於契託饒賜錢傾府待爭米駐船遙鄰好艱難  
薄氓心杼軸焦客星空伴使寒水不成潮素髮  
乾垂領銀章破在腰說詩能累夜醉酒或連朝

藻翰惟牽率湖山合動搖時清非造次興盡却  
蕭條天子多恩澤蒼生轉寂寥休傳鹿是馬莫  
信鵬如鴉未解依依袂還斟泛泛瓢流年疲蟋  
蟀體物幸鷦鷯孤負滄洲願誰云晚見招

奉贈蕭二十使君

杜甫

昔在嚴公幕俱爲蜀使臣艱危參大府前後間  
清塵起草鳴先路乘槎動要津王鳧聊暫出蕭  
雉只相馴終始任安義荒蕪孟母鄰聯翩匍匐  
禮意氣死生親張老存家事稽康有故人食恩



慙鹵莽鏤骨抱酸辛巢許山林志夔龍廊廟珍  
鵬圖仍矯翼熊軾且移輪磊落衣冠地蒼茫土  
木身墳篋鳴自合金玉瑩逾新重憶羅江外同  
遊錦水濱結歡隨過隙懷舊憶霑巾曠絕含香  
舍稽留伏枕辰停驂雙闕早回鴈五湖春不達  
長卿病從來原憲貧監河受貸粟一起轍中鱗

贈北部蕭郎中十兄

杜甫

有美生人傑由來積德門漢朝丞相系梁日帝  
王孫蘊藉爲郎久魁梧秉哲尊詞華傾後輩風

雅藹孤騫宅相榮姻戚兒童惠討論見知真自  
幼謀拙媿諸昆漂蕩雲天濶沈埋日月奔致君  
時已晚懷古意空存中散山陽鍛愚公野谷村  
寧紆長者轍歸老任乾坤

贈裴南部聞袁判官自來欲有按問

杜甫

塵滿萊蕪甌堂橫單父琴人皆知飲水公輩不  
偷金梁獄書應作秦臺鏡欲臨獨醒時所嫉羣  
小謗能深卽出黃沙在何須白髮侵使君傳舊



德已見直繩心

奉賀陽城郡王太夫人恩命加鄧國太

夫人

杜甫

衛幕銜恩重潘輿送喜頻濟時瞻上將錫號戴  
慈親富貴當如此尊榮邁等倫郡依封土舊國  
與大名新紫誥鸞迴紙清朝燕賀人遠傳冬笋  
味更覺綵衣春奕葉班姑史芬芳孟母鄰義方  
兼有訓詞翰兩如神委曲承顏體騫飛報主身  
可憐忠與孝雙美畫麒麟

遣悶奉呈嚴鄭公二十韻 杜甫

白水漁竿客清秋鶴髮翁胡爲來幕下祗合在  
舟中黃卷真如律青袍也自公老妻憂坐痺幼  
女問頭風平地專欹倒分曹失異同禮甘衰力  
就義忝上官通疇昔論詩早光輝仗鉞雄寬容  
存性拙翦拂念途窮露裊思藤架煙霏想桂叢  
信然龜觸網直作鳥窺籠西嶺紆村北南江繞  
舍東竹皮寒舊翠椒實雨新紅浪簸船應坼杯  
乾甕卽空藩籬生野徑斤斧任樵童束縛酬知



已蹉跎効小忠周防期稍稍太簡遂忽忽曉入  
朱扉啓昏歸畫角終不成尋別業未敢息微躬  
烏鵲愁銀漢駑駘怕錦幪會希全物色時放倚  
梧桐

移居公安敬贈衛太郞

杜甫

衛侯不易得余病汝知之雅量涵高遠清襟照  
等夷平生感意氣少小愛文辭河海由來合風  
雲若有期形容勞宇宙質朴謝軒墀自古幽人  
泣流年壯士悲水煙通徑草秋露接園葵入邑  
豺狼鬪傷弓鳥雀饑白頭供宴語烏几伴棲遲  
交態遭輕薄今朝豁所思

行次古城店泛江作不揆鄙拙奉呈江

陵幕府諸公

杜甫

老年常道路遲日復山川白屋花開裏孤城麥  
秀邊濟江元自闊下水不勞牽風蝶勤依槩春  
鷗懶避船王門高德業幕府盛材賢行色兼多  
病蒼茫泛愛前

水宿遣興奉呈羣公

杜甫



魯鈍仍多病逢迎遠復迷耳聾須畫字髮短不  
勝篋澤國雖勤雨炎天竟淺泥小江還積浪弱  
纜且長堤歸路非關北行舟却向西暮年漂泊  
恨今夕亂離啼童稚頻書札盤飧詎糝藜我行  
何到此物理直難齊高枕翻星月嚴城疊鼓鼙  
風號聞虎豹水宿伴鳧鷖異縣驚虛往同人惜  
解攜蹉跎長泛鷁展轉屢聞鷄疑疑瑚璉器陰  
陰桃李蹊餘波期救涸費日苦輕齋杖策門闌  
邃肩輿羽翮低自傷甘賤役誰愍疆幽棲巨海

能無釣浮雲亦有梯勲庸思樹立語默可端倪  
贈粟困應指登橋柱必題丹心老未折時訪武  
陵谿

同豆盧峯貽主客李員外賢子斐知字

韻

杜甫

鍊金歐冶子噴玉大宛兒符彩高無敵聰明達  
所爲夢蘭他日應折桂早年知爛熳通經術光  
芒刷羽儀謝庭瞻不遠潘省會於斯唱和將雛  
曲田翁號鹿皮



元日示宗武

杜甫

汝啼吾手戰，吾笑汝身長。  
處處逢正月，迢迢滯遠方。  
飄零還柏酒，衰病只藜牀。  
訓諭青衿子，名慚白首郎。  
賦詩猶落筆，獻壽更稱觴。  
不見江東弟，高歌淚數行。

又示宗武

杜甫

覓句新知律，攤書解滿牀。  
試吟青玉案，莫羨紫羅囊。  
暇日從時飲，明年共我長。  
應須飽經術，已似愛文章。  
十五男兒志，三千弟子行。  
曾參與游

夏達者得升堂

贈李郎中

楊浚

仙郎早朝退，直省卧南軒。  
院竹自成賞，階庭寂不喧。  
焚香開後閣，起草閉前門。  
禮樂風流美，光華星位尊。  
榮兼朱紱貴，交乃布衣存。  
是日登龍客，無忘君子恩。

奉和中書常舍人晚秋集賢院卽事寄

贈徐薛二侍御

獨孤及

漢家金馬署，帝座紫微郎。  
圖籍凌羣玉，歌詩冠



柏梁陰陰萬年樹蕭蕭五經堂揮翰忘朝食研  
精待夕陽晴空露盤迴秋月瑣窓涼遠興生斑  
鬢高情寄縹囊歲蕤雙鸞鴛夙昔並翱翔汲冢  
同刊謬蓬山共補亾差池推羽翮流落限江湘  
禁省一分袂旻天三兩霜石渠遺跡滿水國暮  
雲長早晚朝宣室歸時道路光

盛唐彙詩卷第九十六

四唐彙詩一百六十六

盛唐彙詩卷第九十七

四唐彙詩一百六十七

新都 吳勉學 編輯

陸慶祥 校訂

五言排律

贈答

淮南寄舍弟

王泠然

昔予從不調經歲旅淮源念爾長相失何時返  
故園寄書迷處所分袂隔涼溫遠道俱爲客他  
鄉共在原歸情春伴鴈愁泣夜隨猿愧見高堂



上朝朝獨倚門

自樂城赴永嘉枉路泛白湖寄松陽李

少府

張子容

西行礙淺石北轉入谿橋樹色煙輕重湖光風  
動搖百花亂飛雪萬嶺疊青霄猿掛臨潭篠鷗  
迎出浦橈惟應賞心客茲路不言遙

陪張丞相登荆城樓因寄荊州張使君  
及浪泊戍主劉家

孟浩然

薊門天北畔銅柱日南端出守聲彌遠投荒法

未寬側身聊倚望携手莫同歡白壁無瑕玷青  
松有歲寒府中丞相閣江上使君灘興盡迴舟  
去方知茲路難

奉和許給事夜直簡諸公

崔顥

西掖黃樞近東曹紫禁連地因才子拜人用省  
郎遷夜直千門靜河明萬象懸建章宵漏急閭  
闔曉鐘傳寵列貂蟬位恩深侍從年九重初起  
草五夜卽成篇顧已無官次循涯但自憐遠陪  
蘭署作空此仰神僊



和刑部成員外秋夜寓直寄臺省知己

岑參

列宿光三署仙郎直五宵時衣天子賜厨膳大  
官調長樂鐘應近明光漏不遙黃門持被覆侍  
女捧香燒筆爲題詩點燈緣起草挑竹喧交砌  
葉柳鞞拂窓條粉署榮新命霜臺憶舊寮名香  
播蘭蕙重價蘊瓊瑤擊水翻滄海搏風透赤霄  
微才喜同舍何幸忽聞韶

家園夜坐寄郭微

祖詠

前堦微雨歇開戶散窺林月出夜方淺水涼池  
更深餘風生竹樹清露薄衣襟遇物遂遙歎懷  
人滋遠心依稀成夢想影響絕徽音誰念窮居  
者明時嗟陸沈

寄隴右嚴判官

劉方平

副相西征重蒼生屬望晨還同周薄伐不取漢  
和親虜障摧枯易王師決勝頻高旗臨鼓角太  
白靜風塵赤狄爭歸化青羌已請臣遙傳闔外  
美盛選幕中賓玉劍光初發水壺色自真忠貞



期報主章服豈榮身邊草含風綠征鴻過月新  
胡笳長出塞隴水半歸秦絕漠多來往連年厭  
苦辛路經西漢雪家擲後園春誰念煙雲裏深  
居汝潁濱一叢黃菊地九日白衣人松葉踈開嶺  
桃花密映津縑書若有寄爲訪許由鄰

奉和苑舍人宿直曉翫新池寄南省友

沈東美

傳聞閭闔裏寓直有神仙史爲三墳博郎因五  
字遷晨臨翔鳳沼春注躍龍泉去似登天上來

如看鏡前影搖宸翰發波淨列星懸旣濟仍懷  
友流謙欲進賢彈冠聲實貴覆被渥恩偏温室  
言雖阻文場契獨全玉珂光赫奕朱紱氣蟬聯  
興逸潘仁賦名高謝朓篇青雲仰不逮白雪和  
難牽冉冉胡爲此甘心老歲年

春日歸山寄孟六浩然

李白

朱紱遺塵境青山謁梵筵金繩開覺路寶筏度  
迷川嶺樹攢飛拱巖花覆谷泉塔形標海月樓  
勢出江煙香氣三天下鐘聲萬壑連荷秋珠已



滿松密蓋初圓鳥聚疑聞法龍叅若護禪愧非  
流水韻叨入伯牙絃

宣州九日聞崔四侍御與宇文太守遊  
敬亭余時登響山不同此賞醉後寄崔

侍御

李白

九卿天上落五馬道傍來列戟朱門曉褰帷碧  
嶂開登高望遠海召客得英才紫綬歡情洽黃  
花逸興催山從圖上見谿卽鏡中迴遙羨重陽  
作應過戲馬臺

秋日夔府詠懷奉寄鄭監李賓客一百  
韻

杜甫

絕塞烏蠻北孤城白帝邊飄零仍百里消渴已  
三年雄劔鳴開匣羣書滿繫船亂離心不展衰  
謝日蕭然筋力妻孥問菁華歲月遷登臨多物  
色陶冶賴詩篇峽束滄江起巖排古樹圓拂雲  
霾楚氣潮海蹴吳天煮井爲鹽速燒畝度地偏  
有時驚疊嶂何處覓平川鷄鶻雙雙舞獼猴壘  
壘懸碧蘿長似帶錦石小如錢春草何曾歇寒



花亦可憐獵人吹戍火野店引山泉喚起搔頭  
急扶行幾屐穿兩京猶薄產四海絕隨肩幕府  
初交辟郎官幸備員瓜時猶旅寓萍泛若夤緣  
藥餌虛狼藉秋風洒靜便開襟驅瘴癘明日掃  
雲煙高宴諸侯禮佳人上客前哀箏傷老大華  
屋豔神仙南內開元曲常時弟子傳法歌聲變  
轉滿座淚潺湲弔影夔州僻回腸杜曲煎卽今  
龍廐水莫帶犬戎羶耿賈扶王室蕭曹拱御筵  
乘威滅蜂虿戮力效鷹鷂舊物森猶在凶徒惡

未俊國須行戰伐人憶止戈鋌奴僕何知禮恩  
榮錯與權胡星一彗李黔首遂拘攣哀痛絲綸  
切煩苛法令蠲業成陳始王兆喜出于畋宮禁  
經綸密台階翊戴全能罷載呂望鴻鴈美周宣  
側聽中興主長吟不世賢音徽一柱數道里下  
牢千鄭李光時論文章並我先陰何尚清省沈  
宋歛聯翩律比崑崙竹音知燥濕絃風流俱善  
價愜當久忘筌置驛常如此登龍蓋有焉雖云  
隔禮數不敢墜周旋高視收人表虚心味道玄



馬來皆汗血鶴唳必青田羽翼商山起蓬萊漢  
閣連管寧紗帽淨江令錦袍鮮東郡時題壁南  
湖日扣舷遠遊凌絕境佳句染華牋每欲孤飛  
去徒爲百慮牽生涯已寥落國步尚迤邐衾枕  
成蕪沒池塘作弃捐別離憂怛怛伏臘涕漣漣  
露菊斑豐鎬秋菰影澗瀍共誰論昔事幾處有  
新阡富貴空回首喧爭懶著鞭兵戈塵漠漠江  
漢月娟娟局促看秋燕蕭疎聽晚蟬彫蟲蒙記  
憶烹鯉問沈綿卜羨君平杖屨存子敬氈囊空

把釵釧米盡折花鈿甘子陰涼葉茅齋八九椽  
陣圖沙北岸市暨灤西巔羈絆心常折棲遲病  
卽痊紫收岷嶺芋白種陸家蓮色好梨勝頰穰  
多栗過拳勅厨唯一味求飽或三鱸兒去看魚  
笥人來坐馬韉縛柴門窄窄通竹溜涓涓塹抵  
公畦稜村依野廟墻缺籬將棘拒倒石賴藤纏  
借問頻朝謁何如穩晝眠誰云行不逮自覺坐  
能堅霧雨銀章溼馨香粉署妍紫鸞無遠近黃  
雀任翩翩困學違從衆明公各勉旃聲華夾宸



極早晚到星躔懇諫留匡鼎諸儒引服虔不逢  
輸鯁直會是正陶甄宵旰憂虞軫黎元疾苦駢  
雲臺終日畫青簡爲誰編行路難何有招尋興  
已專由來具飛檝暫擬控鳴絃身許雙峯寺門  
求七祖禪落帆追宿昔衣褐向真詮安石名高  
晉昭王客赴燕途中非阮藉查上似張騫披拂  
雲寧在淹留景不延風期終破浪水恠莫飛涎  
他日辭神女傷春怯杜鵑淡交隨聚散澤國遶  
迴旋本自依伽葉何曾藉倭佗鑪峯生轉眄橘

井尚高寒東走窮歸鶴南征盡跼鳶晚聞多妙  
教卒踐塞前愆顧凱丹青列頭陀琬琰鑄衆香  
深黯黯幾地肅芊芊勇猛爲心極清羸任體孱  
金篋空刮眼鏡象未離銓

舟中出江陵南浦奉寄鄭少尹審

杜甫

更欲投何處飄然出此都形骸元土木舟楫復  
江湖社稷纏妖氣干戈送老儒百年同棄物萬  
國盡窮途雨洗平沙淨天銜澗岸紆鳴蜚隨泛



梗別燕赴秋菰棲託難高臥饑寒迫向隅寂寥  
相煦沫浩蕩報恩珠溟漲鯨波動衡陽鴈影徂  
南征問懸榻東逝想乘桴濫竊商歌聽時憂卜  
泣誅經過憶鄭驛斟酌旅情孤

寄岳州賈司馬六丈巴州嚴八使君兩

閣老五十韻

杜甫

衡嶽啼猿裏巴州鳥道邊故人俱不利謫宦兩  
悠然開闢乾坤正榮枯雨露偏長沙才子遠釣  
瀨客星懸憶昨趨行殿殷憂捧御筵討胡愁

李廣奉使待張騫無復雲臺仗虛修水戰船蒼  
茫城七十流落劔三千畫角吹秦晉旄頭俯澗  
瀦小儒輕董卓有識笑苻堅浪作禽填海那堪  
血射天萬方思助順一鼓氣無前陰散陳倉北  
晴薰太白顛亂麻屍積衛破竹勢臨燕法駕還  
雙闕王師下八川此時霑奉引佳氣拂周旋貌  
虎開金匣麒麟受玉鞭侍臣諳入伏廐馬解登  
仙花動朱樓雪城凝碧樹煙衣冠心慘愴故老  
淚潺湲哭廟悲風急朝正暮景鮮月分梁漢米



春得水衡錢內菜繁於纈宮莎軟勝綿恩榮同  
拜手出入最隨肩晚著華堂醉寒重繡被眠轡  
齊兼秉燭書在滿懷牋每覺昇元輔深期列大  
賢秉鈞方咫尺鍛翻再聯翩禁掖朋從改微班  
性命全青蒲甘受戮白髮竟誰憐弟子貧原憲  
諸生老伏虔師資謙未達鄉黨敬何先舊好腸  
堪斷新愁眼欲穿翠乾危棧竹紅膩小湖蓮賈  
筆論孤憤嚴詩賦幾篇定知深意苦莫使衆人  
傳貝錦無停織朱絲有斷絃浦鷗防碎首霜鶻

不空拳地僻昏炎瘴山稠隘石泉且將棋度日  
應用酒爲年典郡終爲眇治中實棄捐安排求  
傲吏比興展歸田去去才難得蒼蒼理又玄古  
人稱逝矣吾道卜終焉隴外翻投跡漁陽復控  
弦笑爲妻子累日與歲時遷親故行稀少兵戈  
動接聯他鄉饒夢寐失侶自迤邐多病加淹泊  
長吟阻靜便如公盡雄俊志在必騰騫

奉寄河南韋尹丈人

杜甫

有客傳河尹逢人問孔融青囊仍隱逸章甫尚



西東鼎食爲門戶詞場繼國風尊榮瞻地絕踈  
放憶途窮濁酒尋陶令丹砂訪葛洪江湖漂裋  
褐霜雪滿飛蓬牢落乾坤大周流道術空謬慙  
知薊子真怯笑揚雄盤錯神明懼謳歌德義豐  
尸鄉餘土室難說祝雞翁

寄劉峽州伯華使君四十韻 杜甫

峽內多雲雨秋來尚鬱蒸遠山朝白帝深水謁  
夷陵遲暮嗟爲客西南喜得朋哀猿更起坐落  
鴈失飛騰伏枕思瓊樹臨軒對玉繩青松寒不

落碧海闊逾澄昔歲文爲理羣公價盡增家聲  
同令聞時論以儒稱太后當朝肅多才接迹昇  
翠虛捎颺颺丹極上鷗鵬宴引春壺酒恩分夏  
簞冰雕章五色筆紫殿九華燈學並盧王敏書  
偕褚薛能老兄真不墜小子獨無承近有風流  
作聊從月竈微放蹄知赤驥捩翅服蒼鷹卷軸  
來何晚襟懷庶可憑會期吟諷數益破旅愁凝  
雕刻初誰料纖毫欲自矜神融躡飛動戰勝洗  
侵陵妙取筌蹄棄高宜百萬層白頭遺恨在青



竹幾人登回首追談笑勞歌跼寢興年華分已  
矣世故莽相仍刺史諸侯貴郎官列宿應潘生  
驂閣遠黃霸壘書增乳贇號攀石饑鼯訴落藤  
藥囊親道士灰劫問胡僧憑久烏皮綻簪稀白  
帽稜林居看蟻穴野食待魚罾筋力交凋喪飄  
零免戰競皆爲百里宰正似六安丞姪女縈新  
裏丹砂冷舊枰但求椿壽永莫慮杞天崩鍊骨  
調情性張兵撓棘矜養生終自惜代數必全懲  
政術甘踈誕詞場媿服膺展懷詩頌魯割愛酒

如澗咄咄寧書字冥冥欲避矰江湖多白鳥天  
地有青蠅

寄韋有夏郎中

杜甫

省郎憂病士書信有柴胡飲子頻通汗懷君想  
報珠親知天畔少藥餌峽中無歸楫生衣臥春  
鷗洗翅呼猶聞上急水早作取平塗萬里皇華  
使爲僚記腐儒



盛唐彙詩卷第九十七

四唐彙詩二百六十七

盛唐彙詩卷第九十八

四唐彙詩二百六十八

新都

吳勉學 編輯

陸慶祥 校訂

五言排律

贈答

寄董卿嘉榮十韻

杜甫

聞道君牙帳防秋近赤霄下臨千嶺雪却背五  
繩橋海內久戎服京師今晏朝犬羊曾爛熳官  
闕尚蕭條猛將宜嘗膽龍泉必在腰黃圖遭汚



辱月窟可焚燒會取干戈利無令斥候驕居然  
雙捕虜自是一嫖姚落日思輕騎高天憶射鵰  
雲臺畫形像皆為掃氛妖

寄司馬山人十二韻

杜甫

關內昔分袂天邊今轉蓬驅馳不可說談笑偶  
然同道術曾留意先生早擊蒙家家迎薊子處  
處識壺公長嘯峨眉北潛行玉壘東有時騎猛  
虎虛室使仙童髮少何勞白顏衰肯更紅望雲  
悲輶軻畢景羨冲融喪亂形仍役淒涼信不通

懸旌要路口倚劔短亭中永作殊方客殘生一  
老翁相哀骨可換亦遣馭清風

寄李十二白二十韻

杜甫

昔年有往客號爾謫仙人筆落驚風雨詩成泣  
鬼神聲名從此大汨沒一朝伸文彩承殊渥流  
傳必絕倫龍舟移棹晚獸錦奪袍新白日來深  
殿青雲滿後塵乞歸優詔許遇我宿心親未負  
幽棲志兼全寵辱身劇談憐野逸嗜酒見天真  
醉舞梁園夜行歌泗水春才高心不展道屈善



無鄰處士禰衡俊諸生原憲貧稻梁求未足  
蕙以謗何頻五嶺炎蒸地三危放逐臣幾年遭鵬  
鳥獨泣向麒麟蘇武先還漢黃公豈事秦楚筵  
辭醴日梁獄上書辰已用當時法誰將此義陳  
老吟秋月下病起暮江濱莫惟恩波隔乘槎與  
問津

寄彭州高三十五使君適虢州岑二十

七長史參三十韻

杜甫

故人何寂寞今我獨淒涼老去才難盡秋來興

甚長物情尤可見詞客未能忘海內知名士雲  
端各異方高岑殊緩步沈鮑得同行意愜關飛  
動篇終接混茫舉天悲富駱近代惜盧王似爾  
官仍貴前賢事可傷諸侯非棄擲半刺已翱翔  
詩好幾時見書成無使將男兒行處是客子鬪  
身強羈旅推賢聖沈綿抵咎殃三年猶瘡疾一  
鬼不銷亾隔日搜脂髓增寒抱雪霜徒然潛隙  
地有覩屢鮮妝何太龍鍾極于今出處妨無錢  
居帝里盡室在邊疆劉表雖遺恨龐公至死藏



心微傍魚鳥肉瘦怯豺狼隴草蕭蕭白洮雲片  
片黃彭門劔閣外號畧鼎湖傍荆玉簪頭冷巴  
牋染翰光烏麻蒸續曬丹橘露應嘗豈異神仙  
宅俱兼山水鄉竹齋燒藥竈花嶼讀書牀更得  
清新否遙知對屬忙舊官寧改漢淳俗本歸唐  
濟世宜公等安貧亦士常蚩尤終戮辱胡羯謾  
猖狂會待祆氛靜論文暫裹糧

寄張十二山人彪三十韻

杜甫

獨臥嵩陽客三違潁水春艱難隨老母慘澹向

時人謝氏尋山屐陶公漉酒巾羣兇彌宇宙此  
物在風塵歷下辭姜被關西得孟鄰早通交契  
密晚接道流新靜者心多妙先生藝絕倫草書  
何太古詩興不無神曹植休前輩張芝更後身  
數篇吟可老一字買堪貧將恐曾防寇深潛託  
所親寧聞倚門夕盡力潔餐晨踈嬾爲名誤驅  
馳喪我真索居猶寂寞相遇益愁辛流轉依邊  
徼逢迎念席珍時來故舊少亂後別離頻世祖  
修高廟文公賞從臣商山猶入楚渭水不離秦



存想青龍秘騎行白鹿馴耕巖非谷口結草卽  
河濱肘後符應驗囊中藥未陳旅懷殊不愜良  
覲眇無因自古皆悲恨浮生有屈伸此邦今尚  
武何處且依仁鼓角凌天籟關山倚月輪官場  
羅鎮磧賊火近洮岷蕭瑟論兵地蒼茫鬪將辰  
大軍多處所餘孽尚紛紛高興知籠鳥斯文起  
獲麟窮秋正搖落回首望松筠

寄李十四員外布十二韻 杜甫

名參漢望苑職述景題輿巫峽將之郡荆門好

附書遠行無自苦內熱比何如正是炎天闊那  
堪野館踈黃牛平駕浪畫鷁上凌虛試待盤渦  
歇方期解纜初悶能過小徑自爲摘嘉蔬渚柳  
元幽僻村花不掃除宿陰繁素奈過雨亂紅蕖  
寂寂夏先晚泠泠風有餘江清心可瑩竹冷髮  
堪梳直作移巾几秋帆發敞廬

弊廬遣興奉寄嚴公 杜甫

野水平橋路春沙映竹村風輕粉蝶喜花煖蜜  
蜂喧把酒宜深酌題詩好細論府中瞻暇日江



上憶詞源跡忝朝廷舊情依節制尊還思長者  
輒恐避席爲門

承沈八丈東美除膳部員外郎阻雨未  
遂馳賀奉寄此詩

杜甫

今日西京掾多除南省郎通家惟沈氏謁帝似  
馮唐詩律羣公問儒門舊史長清秋便寓直列  
宿頓輝光未暇申安慰含情空激揚司存何所  
比膳部默悽傷貧賤人事畧經過霖潦妨禮同  
諸父長恩豈布衣忘天路牽騏驥雲臺引棟梁

徒懷貢公喜颯颯鬢毛蒼

臨邑舍弟書至苦雨黃河泛溢隄防之  
患簿領所憂因寄此詩用寬其意

杜甫

二儀積風雨百谷漏波濤聞道洪河圻遙連滄  
海高職司憂悄悄郡國訴嗷嗷舍弟卑棲邑防  
川領簿曹尺書前日至版築不時操難假龜鼈  
力空瞻烏鵲毛燕南吹畎畝濟上沒蓬蒿螺蚌  
浦近郭蛟螭成九臯徐關深水府碣石小秋毫



白屋留孤樹青天失萬艘吾衰同泛梗利涉想  
蟠桃倚賴天涯釣猶能掣巨鼇

南出雀鼠谷答張說

玄宗

雷出應乾象風行順國人川途猶在晉車馬漸  
歸秦背陝關山險橫汾鼓吹頻草依陽谷變花  
待北巖春聞有鶴鸞客清詞雅調新求音思欲  
報心跡竟難陳

奉酬張五丈垂贈

儲光羲

綵服去江汜白雲生大梁星辰動異色羔鴈成

新行日望天朝近時憂郢路長情已問邁軸惠  
念及滄浪松柏以之茂江湖亦自忘賈生方弔  
屈豈敢比南昌

奉酬睢陽路太守見贈之作 高適

盛才膺命代高價動良時帝簡登藩翰人和發  
詠思神仙去華省鸛鷺憶丹墀清淨能無事優  
游卽賦詩江山紛想像雲物共萎蕤逸氣劉公  
幹玄言向子期多慙汲引速翻愧激昂遲相馬  
知何限登龍反自疑風塵吏道迫行邁旅心悲



拙疾徒爲爾窮愁欲問誰秋庭一片月朝鏡數  
莖絲州縣甘無取丘園悔莫追瓊瑤生篋笥光  
景借茅茨他日青霄裏猶應訪所知

奉酬睢陽李太守

高適

公族稱王佐朝經允帝求本枝疆我李盤石冠  
諸劉禮樂光輝盛山河氣象幽系高周柱史名  
重晉陽秋華省膺推擇青雲寵宴遊握蘭多具  
美前席有嘉謀賦得黃金賜言皆白壁酬着鞭  
驅駟馬操刃解全牛出鎮兼方伯承家復列侯

朝瞻孔北海時用杜荊州廣固纔登陟毘陵忽  
阻脩三台冀入夢四岳尚分憂郡邑連京口山  
川望石頭海門當建節江路引鳴騶俗見中興  
理人逢至道休先移白額橫更息赭衣偷梁國  
歌來晚徐方怨不畱豈伊齊政術將以變澆浮  
訟簡知能吏刑寬察要囚坐堂風偃草行縣雨  
隨輶地是蒙莊宅城遺闕伯丘孝王餘井徑微  
子故田疇冬至招搖轉天寒蟬螻收猿巖飛雨  
雪兔苑落梧楸列戟霜侵戶褰幃月在鈎好賢



常解榻乘興每登樓逸足橫千里高談注九流  
詩題青玉案衣贈黑貂裘窮巷軒車靜閑齋耳  
目愁未能方管樂翻欲慕巢由講德良難敵觀  
風豈易儔寸心仍有適江海一扁舟

酬河南節度使賀蘭大夫見贈之作

高適

高閣憑欄檻中軍倚旆旌感時常激切於已卽  
忘情河華屯妖氣伊瀍有戰聲媿無戡難策多  
謝出師名秉鉞知恩重臨戎覺命輕股肱瞻列

岳唇齒賴長城隱隱摧鋒勢光光弄印榮魯連  
真義士陸遜豈書生直道寧殊智先鞭忽抗行  
楚雲隨去馬淮月尚連營撫劍堪投分悲歌益  
不平從來重然諾况值欲橫行

酬汴州李別駕贈

祖詠

秋風多客思行旅厭艱辛自洛非才子遊梁得  
主人文章參末議榮賤豈同倫歎逝逢三演懷  
賢憶四真情因恩舊好契託死生親所媿能投  
贈清言益潤身



奉酬中書相公至日圓丘攝事合於中  
書後閣宿齋移止於集賢院叙懷見寄  
之作

崔曙

典籍開書府恩榮避鼎司  
郊丘資有事齋戒守  
無爲宿霧蒙瓊樹餘香覆玉墀  
進經逢乙夜展  
禮值明時勳共山河列名同竹帛  
垂年年佐堯  
舜相與致雍熙

江上苔崔宣城

李白

太華三芙蓉明星玉女峯  
尋仙下西嶽陶令忽

相逢問我將何事湍波歷幾重  
貂裘非季子鶴  
氈似王恭謬忝燕臺召而陪郭隗  
蹤水流知入  
海雲去或從龍樹繞蘆洲  
月山鳴鵲鎮鐘還期  
如可訪台嶺蔭長松

王閬州筵奉酬十一舅惜別之作

杜甫

萬壑樹聲滿千崖秋氣高  
浮舟出郡郭別酒寄  
江濤良會不復久此生何太勞  
窮愁但有骨羣  
盜尚如毛吾舅惜分手使君寒  
贈袍沙頭暮黃



鵠失侶亦哀號

酬別杜二

嚴武

獨逢堯典日再覩漢官時未效風霜勁空慙雨露私夜鐘清萬戶曙漏拂千旗並向殊庭謁俱承別館追斗城憐舊路涸水惜歸期峰樹還相伴江雲更對垂試迴滄海棹莫妬敬亭詩祗是書應寄無忘酒共持但令心事在未肯鬢毛衰最悵巴山裏清猿醒夢思

江寧訓鄭縣劉少府兄贈別作

獨孤及

往年脫縫掖接武仕關西結綬腰章並趨堦手板齊仙山不用買朋酒日相携抵掌誇譚壑忘情向組珪事遷時旣往年長跡逾睽何爲青雲器猶嗟濁水泥役牽方遠別道在或先迷莫見良田晚遭時亦杖藜



盛唐彙詩卷第九十八

四唐彙詩二百六十八

盛唐彙詩卷第九十九

四唐彙詩二百六十九

新都

吳勉學 編輯

江晏如 校訂

五言排律

送別

集賢書院成送張說上集賢學士賜宴

得珍字

玄宗

廣學開書院崇儒引席珍集賢招袞職論道命  
台臣禮樂沿今古文章革舊新獻酬樽俎列賓



主位班陳節變雲初夏時移氣尚春所希光史  
冊千載仰茲晨

送張說巡邊

玄宗

端拱復垂裳長懷御遠方股肱申教義戈劍靖  
要荒命將綏邊服雄圖出廟堂三台入武帳八  
座起文昌寶胄匡韓主華宗輔漢王茂先慙博  
物平子謝文章盡節恢時佐輸誠禦寇場三軍  
臨朔野駟馬卽戎行鼓吹威夷狄旌軒溢洛陽  
雲臺先著美今日更貽芳

餞王駿巡邊

玄宗

振武威荒服揚文肅遠墟金壇申將禮玉節授  
軍符免胄三方外銜刀萬里餘昔時吳會靜今  
日虜庭虛分闔仍推轂援桴且訓車風揚旌旆  
遠雨洗甲兵初坐見台階謚行聞祆祲除檄來  
雖插羽箭去亦飛書舟楫功須著鹽梅望匪疎  
不應陳七德欲使化先敷

王屋山送道士司馬承禎還天台

玄宗



紫府求賢士清谿祖逸人江湖與城闕異跡且  
殊倫間有幽棲者居然厭俗塵林泉先得性芝  
桂欲調神地道踰稽嶺天台接海濱音徽從此  
間萬古一芳春

奉和聖製暮春送朝集使歸郡應制

王維

萬國仰宗周衣冠拜冕旒玉乘迎大客金節送  
諸侯祖席傾三省寒帷向九州楊花飛上路槐  
色蔭通溝來預鈞天樂歸分漢主憂宸章類河

漢垂象滿中州

送秘書晁監還日本國

并序

王維

舜觀羣后有苗不格禹會諸侯防風後至動  
干戚之舞興斧鉞之誅乃貢九牧之金始頒  
五瑞之玉我開元天地大寶聖文神武應道  
皇帝大道之行先天布化乾元廣運涵育無  
垠若華爲東道之標戴勝爲西門之候豈甘  
心於筇杖非徵貢於包茅亦由呼邪來朝舍  
於蒲萄之館卑彌遣使報以蛟龍之錦犧牲



玉帛以將厚意服食器用不寶遠物百神受  
職五老告期况乎戴髮含齒得不稽顙屈膝  
海東國日本爲大服聖人之訓有君子之風  
正朔本乎夏時衣裳同乎漢制歷歲方達繼  
舊好於行人滔天無涯貢方物於天子同儀  
加等位在王侯之先掌次改觀不居蠻夷之  
邸我無爾詐爾無我虞彼以好來廢關弛禁  
上敷文教虛至寶歸故人民襍居往來如市  
晁司馬結髮遊聖負笈辭親問禮於老聃學

詩於子夏魯借車馬孔丘遂適於宗周鄭獻  
縞衣季札始通於上國名成太學官至客卿  
必齊之姜不歸娶於高國在楚猶晉亦何獨  
於由余遊宦三年願以君羹遺母不居一國  
欲其晝錦還鄉莊烏旣顯而思歸關羽報恩  
而終去於是稽首北闕裹足東轅篋命賜之  
衣懷敬問之詔金簡玉字傳道經於絕域之  
人方鼎彝樽致分噐於異姓之國琅琊臺上  
迴望龍門碣石館前復然鳥逝鯨魚噴浪則



萬里倒迴鷁首乘雲則八風却走扶桑若薺  
鬱島如萍沃白日而歛三山浮蒼天而吞九  
域黃雀之風動地黑蜃之氣成雲森不知其  
所之何相思之可寄嘻去帝鄉之故舊謁本  
朝之君臣詠七子之詩佩兩國之印恢我王  
度諭彼蕃臣三寸猶在樂毅辭燕而未老十  
年在外信陵歸魏而逾尊子其行乎余贈言  
者

積水不可極安知滄海東九州何處遠萬里若

乘空向國唯看日歸帆但信風鰲身映天黑魚  
眼射波紅鄉樹扶桑外主人孤島中別離方異  
域音信若爲通

送禰郎中

王維

東郊春草色驅馬去悠悠况復鄉山外猿啼湘  
水流島夷傳露版江館候鳴騶卉服爲諸吏珠  
官拜本州孤鶩吟遠墅野杏發山郵早晚方歸  
奏南中纔忌秋

送康大守

王維



城下滄江水江邊黃鶴樓朱瀾將粉堞江水映  
悠悠鏡吹發夏口使君居上頭郭門隱楓岸候  
吏趨蘆洲何異臨川郡還勞康樂侯

送熊九赴任安陽

王維

魏國應劉後寂寥文雅空漳河如舊日之子繼  
清風阡陌銅臺下閭闔金虎中送車盈灞上輕  
騎出關東相去千餘里西園明月同

送李太守赴上洛

王維

商山包楚鄧積翠藹沈沈驛路飛泉灑開門落

照深野花開古戍行客響空林板屋春多雨山  
城晝欲陰丹泉通號略白羽抵荆岑若見西山  
爽應知黃綺心

送權二

王維

高人不可有清論復何深一見如舊識一言知  
道心明時當薄宦解薛去中林芳草空隱處白  
雲餘故岑韓侯久攜手河嶽共幽尋悵別千餘  
里臨堂鳴素琴

送閻校書之越

丘爲



南入剡中路草雲應轉微湖邊好光照山口細  
泉飛此地饒古跡世人多忘歸經年松雪在永  
日世情稀芸閣應相望芳時不可違

送莫甥兼諸昆弟從韓司馬入西軍

孟浩然

念爾習詩禮未曾違戶庭平生早偏露萬里更  
飄零坐棄三牲養行觀八陣形飾裝辭故里謀  
策赴邊庭壯志吞鴻鵠遙心伴鶴鷁所從文與  
武不戰自應寧

送韓使君除洪州都曹

孟浩然

述職撫荆衡分符襲寵榮往來看擁傳前後賴  
專城勿翦棠猶在波澄水更清重推江漢理旋  
改豫章行召父多遺愛羊公有令名衣冠列祖  
道耆舊擁前旌峴首晨風送江陵夜火迎無才  
慙孺子千里愧同聲

送王昌齡之嶺南

孟浩然

洞庭去遠近楓葉早驚秋峴首羊公愛長沙賈  
誼愁土毛無編紵鄉味有槎頭已抱沈痼疾更



貽魑魅憂數年同筆硯茲夕間衾裯意氣今何在  
相思望斗牛

峴山送蕭員外之荊州

孟浩然

峴山江岸曲郢水郭門前自古登臨處非今獨  
黯然亭樓明落照井邑秀通川澗竹生幽興林  
風入管絃再飛鵬激水一舉鶴冲天佇立三荆  
使看君駟馬旋

峴山送張去非遊巴東

孟浩然

峴山南郭外送別每登臨沙岸江村近村門山

寺深一言予有贈三峽爾將尋祖席宜城酒征  
途雲夢林蹉跎遊子意眷戀故人心去矣勿淹  
滯巴東猿夜吟

送歐陽會稽之任

王昌齡

懷祿貴心賞東流山水長官移會稽郡地邇上  
虞鄉緩帶屏紛雜漁舟臨訟堂逶迤迴谿趣猿  
嘯飛鳥行萬室霽朝雨千峰迎夕陽輝輝遠洲  
映曖曖澄湖光白髮有高士青春期上皇應須  
枉車歇爲我訪荷裳



送金卿歸新羅

陶翰

奉義朝中國殊恩及遠臣鄉心遙渡海客路再  
經春落日誰同望孤舟獨可親拂波銜木鳥偶  
宿泣珠人禮樂夷風變衣冠漢制新青雲已干  
呂知汝重來賓

送祖詠

盧象

田家宜伏臘歲晏子言歸石路雪初下荒村雞  
共飛東原多煙火北澗隱寒暉滿酌野人酒倦  
聞鄰女機胡爲困樵采幾日罷朝衣

送綦毋潛

盧象

夫君不得意本自滄海來高足未云騁虛舟空  
復迴淮南楓葉落灞岸桃花開出處暫爲耳沈  
浮安繫哉如何天覆物還遣世遺才欲識秦將  
漢嘗聞王與裴離筵對寒食別雨乘春雷曾有  
辟書至荷衣莫漫裁

送趙都護赴安西

盧象

下客候旌麾元戎復在斯門開都護府兵動羽  
林兒黠虜多翻覆謀臣有別離智同天所授恩



共日相隨漢使開賓幕胡笳送酒卮風霜迎馬  
首雨雪事魚麗上策應無戰深情屬載馳不應  
行萬里明主寄安危

餞宋八充彭中丞判官之嶺外

高適

覩君濟時略使我氣填膺長策竟不用高才徒  
見稱一朝知己達累日詔書徵羽翮忽然就風  
颺誰敢凌舉鞭趨嶺嶠屈指冒炎蒸北鴈送馳  
驛南人思飲水彼邦本倔強習俗多驕矜翠羽

干平法黃金撓直繩若將除害馬慎勿信蒼蠅  
魑魅寧無患忠貞適有憑猿啼山不斷鳶跼路  
難登海岸出交趾江城連始興繡衣當節制幕  
府盛威稜勿憚九嶷險須令百越澄立談多感  
激行李卽嚴凝離別胡爲者雲霄遲爾昇

送柴司戶充劉卿判官之嶺外

高適

嶺外資雄鎮朝端寵節旄月卿臨幕府星使出  
詞曹海對羊城濶山連象郡高風霜驅瘴癘忠



信涉波濤別恨隨流水交情脫寶刀有才無不  
適行矣莫徒勞

送蔡少府赴登州推事

高適

膠東連卽墨萊水入滄溟國小常多事人訛屢  
抵刑公才徵郡邑詔使出郊坰標格誰當犯風  
謠信可聽崢嶸大峴口邈迤汶陽亭地迴雲偏  
白天秋山更青祖筵方卜晝王事急侵星勸爾  
將爲德斯言蓋有聽

秦中送李九赴越

高適

攜手望千里于今將十年如何每離別心事復  
迤邐適越雖有以出關終耿然愁霖不可向長  
路或難前吳會獨行客山陰秋夜船謝家徵故  
事禹穴訪遺編鏡水君所憶尊羹余舊便歸來  
莫忘此兼示濟江篇

送郭僕射節制劔南

岑參

鐵馬擐紅纓幡旗出禁城明王親授鉞丞相欲  
專征玉饌天厨送金杯御酒傾劔門乘嶮過閣  
道踏空行山鳥驚吹笛江猿看洗兵曉雲隨去



陣夜月逐行營南仲今時往西戎計日平將心  
感知已萬里寄懸旌

送嚴黃門拜御史大夫再鎮蜀川兼觀

省

岑參

授鉞辭金殿承恩戀玉墀登壇漢主用講德蜀  
人思副相韓安國黃門向子期刀州重入夢劔  
閣再題詞春草連青綬晴花間赤旗山鶯朝送  
酒江月夜供詩許國分憂日榮親色養時蒼生  
望已久來去不應遲

送陶銑棄舉荆南觀省

岑參

明時不愛璧浪跡東南遊何必世人識知君輕  
五侯采蘭度漢水問絹過荊州異國有歸興去  
鄉無客愁天寒楚塞雨月淨襄陽秋坐見吾道  
遠令人看白頭

奉送李賓客荆南迎親

岑參

迎親辭舊苑恩照下儲闈昨見雙魚去今看駟  
馬歸驛帆湘水濶客舍楚山稀手把黃香扇身  
披萊子衣鵲隨金印喜烏傍板輿飛勝作東征



賦還家滿路輝

餞王岑判官赴襄陽道

岑參

故人漢陽使走馬向南荆不厭楚山路祗憐襄  
水清津頭習氏宅江上夫人城夜入橘花宿朝  
穿桐葉行害羣應自懾持法固須平甃得青門  
醉斜花速去程

送盧郎中除杭州赴任

岑參

罷起郎官草初分刺史符海雲迎過楚江月引  
歸吳城底濤聲震樓端蜃氣孤千家窺驛舫五

馬飲春湖柳色供詩用鶯聲送酒須知君望鄉  
處枉道上姑蘇

六月三十日水亭送華陰王少府還縣

得潭字

岑參

亭晚人將別池涼酒未酣關門勞夕夢仙掌引  
歸驂荷葉藏魚艇藤花罨客簪殘雲收夏暑新  
雨帶秋嵐失路情無適離懷思不堪賴茲庭戶  
裏別有小江潭

送薛弁歸河東

岑參



薛侯故鄉處五老峰西頭歸路秦樹滅到鄉河  
水流看君馬首去滿耳蟬聲愁獻賦今未售讀  
書凡幾秋應過伯夷廟爲上關城樓樓上能相  
憶西南指雍州

送薛播擢第歸河東

岑參

歸去新戰勝盛名人共聞鄉連渭川樹家近條  
山雲夫子能好學聖朝全用文弟兄負世譽詞  
賦超人羣雨氣醒別酒城陰低暮曛遙知出關  
後更有一終軍

送嚴維下第還江東

岑參

勿歎今不第似君殊未遲且歸滄洲去相送青  
門時望鳥指鄉遠問人愁路疑敝裘沾暮雪歸  
棹帶流澌嚴子灘復在謝公文可追江臯如有  
信莫不寄新詩

聖善閣送裴迪入京

李頎

雲華滿高閣苔色上鈎欄藥草空塔靜梧桐返  
照寒清吟可愈疾攜手暫同歡墜葉和金磬饑  
鳥鳴露盤伊流惜東別灞水向西看舊託含香



署雲霄何足難

昭烈廟送裴侍御使桂陽 李頎

沅上秋草晚蒼蒼  
堯女祠無人見  
精魄萬古寒  
猿悲桂水身  
歿後椒漿神  
降時回雲迎  
赤豹驟  
雨颯文狸受  
命出炎海  
焚香徵楚詞  
乘驄感遺  
跡一弔清川湄

龍門送裴侍御監五嶺選 李頎

萬里番禺地  
官人繼帝憂  
君爲柱下史  
將命出  
東周歇馬傍  
川路張燈臨  
石樓稜稜靜  
踈木渾

渾響寒流榔葉四荒外  
梅花五嶺頭  
明珠尉佗國  
翠羽夜郎洲  
夷俗富珍產  
土風資宦遊  
心清物不雜  
弊革事無留  
舉善必稱最  
持姦當去尤  
何辭桂江遠  
今日用賢秋

送東陽王太守

李頎

江臯杜蘅綠  
芳草日遲遲  
檜楫今何去  
星郎出  
守時彤襜問  
風俗明主寄  
憚發令下不  
徒爾人  
和當在茲昔  
年經此地微  
月有佳期洞  
口桂花  
白巖前春草  
滋素沙靜津  
瀨青壁帶川  
坻野鶴



每孤立林麓常晝悲

送皇甫曾遊襄陽山水兼謁韋太守

李頎

峴山枕襄陽滔滔江漢長山深卧龍宅水淨斬  
蛟鄉元凱春秋傳昭明文選堂風流滿今古煙  
島思微茫白鴈暮衝雪青林寒帶霜蘆花獨戍  
晚柑實萬家香舊國欲茲別輕舟眇未央百花  
亭漫漫一柱觀蒼蒼按俗荆南牧持衡吏部郎  
逢君立五馬應醉習家塘

送盧少府赴延陵

李頎

問君從宦所何日府中趨遙指金陵縣青山天  
一隅行人懷寸祿小吏獻新圖北固波濤險南  
天風俗殊春江連橘柚晚景媚菰蒲漠漠花生  
渚亭亭雲過湖灘沙映春火水霧斂檣鳥回首  
東門路鄉書不可無

送劉主簿歸金壇

李頎

與子十年舊其如離別何宦遊鄰故國歸夢是  
滄波京口青山遠金陵芳草多雲帆曉容裔江



日晝清和縣郭舟人飲津亭漁者歌茅山有仙  
洞美爾再經過

奉送漪叔遊潁川兼謁淮陽太守

李頎

能吏今何適辭家方獨行嵩陽入歸夢潁水半  
前程聞道淮陽守東南卧理清郡齋觀政日人  
馬望鄉情疊嶺雪初霽寒砧霜後鳴臨川嗟拜  
手寂寞事躬耕

送喬琳

李頎

草綠小平津花開伊水濱今君不得意孤負帝  
鄉春口不信金帛心常任屈伸阮公能飲酒陶  
令肯羞貧陽羨風流地滄江遊寓人菱歌五湖  
遠桂樹八公鄰青鳥迎孤棹白雲隨一身潮隨  
秣陵上月映石頭新未可逃名利應須在縉紳  
汀洲芳杜色勸爾暫垂綸

送暨道士還玉清觀

李頎

仙官有名籍度世吳江濱大道本無我青春長  
與君中州俄已到至理得而聞明主降黃屋時



人看白雲空山何窈窕三秀日氛氲遂此留書  
客超遙煙駕分世具玉質大能本無共青卷  
贈別張兵曹王貴顯  
李頎  
漢家蕭相國功蓋五諸侯勲業河山重丹青錫  
命優君爲禁嚮壻爭看玉人遊荀令焚香日潘  
郎振藻秋新成鸚鵡賦能衣鸚鵡裘不憚軒車  
遠仍尋薜荔幽苑黎飛絳葉伊水淨寒流雪滿  
故關道雲遮祥鳳樓一身輕寸祿萬物任虛舟  
別後如相問滄波雙白鷗

杭州北郭戴氏荷池送侯愉

崔國輔

秋近萬物蕭况當臨水時折花贈歸客離緒斷  
荷絲誰謂江國永故人感在茲道存過北郭情  
極望東菑喬木故園意鳴蟬窮巷悲扁舟竟何  
待中路每遲遲



盛唐彙詩卷第九十九

四唐彙詩二百六十九

盛唐彙詩卷第一百

四唐彙詩二百七十

新都 吳勉學 編輯

江晏如 校訂

五言排律

送別

送梁公昌從信安北征 李白

入幕推英選  
捐書事遠戎  
高談百戰術  
鬱作萬夫雄  
起舞蓮花劍  
行歌明月宮  
將飛天地陣  
兵出塞垣通  
祖席留丹景  
征麾拂彩虹  
旋應獻凱



入麒麟閣佇深功

送竇司馬貶宜春

李白

天馬白銀鞍親承明主歡  
鬪雞金宮裏射鴈碧雲端  
堂上羅中貴歌鐘清夜闌  
何言謫南國拂劍坐長歎  
趙璧爲誰點隨珠狂被彈  
聖朝多雨露莫厭此行難

金陵送張十一再遊東吳 李白

張翰黃花句風流五百年  
誰人今繼作夫子世稱賢  
再動遊吳棹還浮入海船  
春光白門柳霞

色赤城天去國難爲別  
思歸各未旋空餘賈生  
淚相顧共悽然

送友人尋越中山水 李白

聞道稽山去偏宜謝客才  
千巖泉灑落萬壑樹縈迴  
東海橫秦望西陵繞越臺  
湖清霜鏡曉濤白雪山來  
八月枚乘筆三吳張翰杯  
此中多逸興早晚向天台

送紀秀才遊越 李白

海水不滿眼觀濤難稱心  
卽知蓬萊石却是巨



鰲簪送爾遊華頂，令予發鳥吟。仙人居射的，道士住山陰。禹穴尋谿入，雲門隔嶺深。綠蘿秋月夜，相憶在鳴琴。

送二季之江東

李白

初發強中作題詩，與惠連多慙。一日長不及二龍賢，西塞當中路。南風欲進船，雲峰出遠海。帆影挂清川，禹穴藏書地。匡山種杏田，此行俱有適。遲爾早歸旋。

送儲邕之武昌

李白

黃鶴高樓月，長江萬里情。春風三十度，空憶武昌城。送爾難爲別，銜杯惜未傾。湖連張樂地，山逐泛舟行。諾謂楚人重，詩傳謝朓清。滄浪吾有曲，寄入棹歌聲。

奉送嚴公入朝十韻

杜甫

鼎湖瞻望遠，象闕憲章新。四海猶多難，中原憶舊臣。與時安反側，自昔有經綸。感激張天步，從容靜塞塵。南圖迴羽翮，北極捧星辰。漏鼓還思晝，宮鶯罷轉春。空留玉帳術，愁殺錦城人。閣道



通丹地江潭隱白蘋此生那老蜀不死會歸秦  
公若登台輔臨危莫愛身

奉送郭中丞兼大僕卿充隴右節度使

三十韻

杜甫

詔發西山將秋屯隴右兵淒涼餘部曲燁赫舊  
家聲鷓鴣乘時去驂騑顧主鳴艱難須上策容  
易卽前程斜日當軒蓋高風捲旆旌松悲天水  
冷沙亂雪山清和虜猶懷惠防邊詎敢驚古來  
於異域鎮靜示專征燕薊奔封豕周秦觸駭鯨

中原何慘黷餘孽尚縱橫箭入昭陽殿笳吟細  
柳營內人紅袖泣王子白衣行宸極妖星動園  
陵殺氣平空餘金椀出無復總帷輕毀廟天飛  
雨焚宮火徹明果恩朝共落榆栴夜同傾三月  
師逾整群胡勢就烹瘡痍親接戰勇決冠垂成  
妙譽期元宰殊恩且列卿幾時回節鉞戮力掃  
攬搶圭竇三千士雲梯七十城耻非齊說客甘  
似魯諸生通籍微班忝周行獨坐榮隨肩趨漏  
刻短髮寄簪纓徑欲依劉表還疑厭禰衡漸衰



那此別忍淚獨含情廢邑狐狸語空村虎豹爭  
人頻墜塗炭公豈忘精誠元帥調新律前軍壓  
舊京安邊仍扈從莫作後功名

暮春江陵送馬大卿公恩命追赴闕下

杜甫

自古求忠孝名家信有之吾賢富才術此道未  
磷緇玉府標孤映霜蹄去不疑激揚音韻徹籍  
甚衆多推潘陸應同調孫吳亦異時北宸徵事  
業南紀赴恩私卿月昇金掌王春度玉墀薰風  
行應律湛露卽歌詩天意高難問人情老易悲  
樽前江漢濶後會且深期

送嚴侍郎到綿州同登杜使君江樓宴  
得心字

杜甫

野興每難盡江樓延賞心歸朝送使節落景惜  
登臨稍稍煙集渚微微風動襟重船依淺瀨輕  
鳥度層陰檻峻背幽谷惚虛交茂林燈光散遠  
近月影靜高深城擁朝來客天橫醉後參窮途  
衰謝意苦調短長吟此會共能幾諸孫賢至今



不勞朱戶閉自待白河沈

送楊六判官使西蕃

杜甫

送遠秋風落西征海氣寒帝京氛祲滿人世別  
離難絕域遙懷怒和親願結歡救書憐替音兵  
甲望長安宣命前程急惟良待子寬子雲清自  
守今日起爲官垂淚方投筆傷時卽據鞍儒衣  
山鳥恠漢節野童看邊酒排金盞夷歌捧玉盤  
草肥蕃馬健雪重拂廬乾慎爾參籌畫從茲正  
羽翰歸來權可取九萬一朝搏

送陵州路使君赴任

杜甫

王室比多難高官皆武臣幽燕通使者岳牧用  
詞人國待賢良急君當拔擢新佩刀成氣象行  
蓋出風塵戰伐乾坤破瘡痍府庫貧衆寮宜潔  
白萬役但平均霄漢瞻佳士泥塗任此身秋天  
正搖落回首大江濱

送梓州李使君之任

杜甫

籍甚黃丞相能名自潁川近看除刺史還喜得  
吾賢五馬何時到雙魚會早傳老思筇竹杖冬



要錦衾眠不作臨岐恨唯聽舉最先火雲揮汗  
日山驛醒心泉遇害陳公殞于今蜀道憐君行  
射洪縣爲我一潸然

奉送蘇州李二十五長史丈之任

杜甫

星拆台鼎地曾爲人所憐公侯終必復經術竟  
相傳食德見從事克家何妙年一毛生鳳穴三  
尺獻龍泉赤壁浮春暮姑蘇落海邊客間頭最  
白惆悵此離筵

奉送二十三舅錄事之攝郴州

崔偉

杜甫

賢良歸盛族吾舅盡知名徐庶高交友劉牢出  
外甥泥塗豈珠玉環堵但柴荆衰老悲人世驅  
馳厭甲兵氣春江上別淚血渭陽情舟鷁排風  
影林鳥反哺聲永嘉多北至勾漏且南征必見  
公侯復終聞盜賊平郴州頗涼冷橘井尚妻清  
從役何蠻貊居官志在行

送魏二十四司直充嶺南掌選崔郎中



判官兼寄韋韶州

杜甫

選曹分五嶺使者歷三湘才美膺推薦君行佐  
紀綱佳聲期共遠雅節在周防明白山濤鑒嫌  
疑陸賈裝故人湖外少春日嶺南長憑報韶州  
牧新詩昨寄將

暮冬送蘇四郎後兵曹適桂州

杜甫

飄飄蘇季子六印佩何遲早作諸侯客兼工古  
體詩爾賢埋照久余病長年悲盧縮須征日樓

蘭要斬時歲陽初盛動王化久礪緇爲入蒼梧  
廟看雲哭九疑

冬晚送長孫漸舍人歸州

杜甫

參卿休坐幄蕩子不還鄉南客瀟湘外西戎鄠  
杜傍衰年傾蓋晚費日繫舟長會面思來札銷  
魂逐去檣雲晴鷗更舞風逆鴈無行匣裏雌雄  
劍吹毛任選將

送蔡希魯都尉還隴右因寄高三十五

書記

杜甫



蔡子身成瘁，彎弓西射胡。健兒寧鬪死，壯士耻  
爲儒。官是先鋒得，材緣挑戰須。身輕一鳥過，槍  
急萬人呼。雲幕隨開府，春城赴上都。馬頭金匱  
匝，駝背錦模糊。咫尺雪山路，歸飛西海隅。上公  
猶寵錫，突將且前驅。漢使黃河遠，涼州白麥枯。  
因君問消息，好在阮元瑜。

奉送王信州峯北歸

杜甫

朝廷防盜賊，供給愍誅求。下詔選郎署，傳聲典  
信州。蒼生今日困，天子嚮時憂。井屋有煙起，瘡

痍無血流。壤歌惟海甸，畫角自山樓。白髮寐常  
早，荒榛農復秋。解龜踰卧轍，遣騎覓扁舟。徐榻  
不知倦，頽川何以酬。塵生彤管筆，寒膩黑貂裘。  
高義終焉在，斯文去矣休。別離同雨散，行止各  
雲浮。林熱鳥開口，江渾魚掉頭。尉佗雖北拜，太  
史尚南留。軍旅應都息，寰區要盡收。九重思諫  
諍，八極念懷柔。徒倚瞻王室，從容仰廟謀。故人  
持雅論，絕塞豁窮愁。復見陶唐理，甘爲汗漫遊。  
送許八拾遺歸江寧觀省甫昔時嘗客



遊此縣於許生處乞瓦棺寺維摩圖樣  
志諸篇末  
杜甫

詔許辭中禁慈顏赴北堂聖朝新孝理祖席倍  
輝光內帛擎偏重宮衣著更香淮陰清夜驛京  
口渡江航春隔雞人晝秋期燕子涼賜書誇父  
老壽酒樂城隍看畫曾饑渴追蹤恨森茫虎頭  
金粟影神妙獨難忘

送大理封主簿五郎親事不合却赴通  
州主簿前閬州賢子余與主簿平章鄭

氏女子垂欲納采鄭氏伯父京書至女  
子已許他族親事遂停  
杜甫

禁籞去東牀趨庭赴北堂風波空遠涉琴瑟幾  
虛張渥水出騏驎崑山生鳳凰兩家誠款款中  
道許蒼蒼頗爲晉秦匹從來王謝郎青春動才  
調白首缺輝光玉潤終孤立珠明得暗藏餘寒  
折花卉恨別滿江鄉

重送劉十弟判官

杜甫

分源豈韋派別浦鴈賓秋年事推兄忝人才覺



弟優經過辨豐劔意氣逐吳鈞垂翅徒衰老先  
鞭不滯留本枝凌歲晚高義豁窮愁他日臨江  
待長沙舊驛樓

湖南送敬十使君適廣陵 杜甫

相見各頭白其如離別何幾年一會向今日復  
悲歌少壯樂難得歲寒心匪他氣纏霜匣滿水  
置玉壺多遭亂實漂泊濟時曾琢磨形容吾較  
老膽力爾誰過秋晚嶽增翠風高湖湧波騫騰  
訪知已淮海莫蹉跎

送單二判官

杜甫

先皇弓劔遠小臣餘此生蹉跎病江漢不復謁  
承明餞爾白頭日永懷丹鳳城遲遲戀屈宋渺  
渺卧荆衡魂斷航舸失天寒沙水清肺肝若稍  
愈亦上赤霄行

秋日荆南送石首薛明府辭滿告别奉  
薛尚書頌德叙懷斐然之作三十韻

杜甫

南征爲客久西候別君初歲滿歸鳥鳴秋來把



鴈書荆門留美化姜被就離居聞道和親入垂  
名報國餘連枝不日並八座幾時除往者胡星  
孛恭惟漢網踈風塵相瀕洞天地一丘墟殿瓦  
鴛鴦坼宮簾翡翠虛鈞陳摧微道槍纍失儲胥  
文物陪巡狩親賢病拮据公時呵嚙貽首唱却  
鯨魚勢愜宗蕭相材非一范睢屍填太行道血  
走浚儀渠滄口師仍會函關憤已攄紫微臨大  
角皇極正乘輿賞從頻峩是殊恩再直廬豈惟  
高衛霍曾是接應徐降集翻翔鳳追攀絕衆狙

侍臣雙宋玉戰策兩穰苴鑿澈勞懸鏡荒無已  
荷鋤嚮來披述作重此憶吹噓白髮甘凋喪青  
雲亦卷舒經綸功不朽跋涉體何如應訝耽湖  
橘常餐占野蔬十年嬰藥餌萬里狎樵漁楊子  
淹投閣鄒生惜曳裾但驚飛熠燿不記改蟾蜍  
煙雨封巫峽江淮略孟諸湯池雖險固遼海尚  
填淤努力輸肝膽休煩獨起予

與嚴二歸奉禮別

杜甫

別君誰煖眼將老病纏身出涕同斜日臨風看



去塵商歌還入夜巴俗自爲鄰尚媿微軀在遙  
聞盛禮新山東群盜散闕下受降頻諸將歸應  
盡題書報旅人

別蘇篋赴湖南幕

杜甫

故人有遊子棄擲傍天隅他日憐才命居然屈  
壯圖十年猶塌翼絕倒爲驚呼消渴今如在提  
攜愧老夫豈知臺閣舊先拂鳳凰雛得實翻蒼  
竹棲枝把翠梧北辰當宇宙南獄據江湖國帶  
風塵色兵張虎豹符數諷封內事揮發府中趨

贈爾秦人策莫鞭駃下駒

贈李八秘書別三十韻

杜甫

往時中補右扈蹕上元初反氣凌行在妖星下  
直廬六龍瞻魏闕萬騎略姚虛玄朔迴天步神  
都憶帝車一戎纔汗馬百姓免爲魚通籍蟠螭  
印差肩列鳳輿事殊迎代邸喜異賞朱虛寇盜  
方歸順乾坤欲晏如不才同補衮奉詔許牽裾  
鵝鷺叨雲閣麒麟滯玉除文園多病後中散舊  
交踈飄泊哀相見平生意有餘風煙巫峽遠臺



榭楚宮虛觸目非論故新文尚起予  
清秋凋碧柳別浦落紅渠消息多  
旗幟經過歎里閭戰連脣齒國軍急  
羽毛書幕府籌頻問山家藥正鋤  
台星入朝謁使節有吹噓西蜀災長  
弭南翁憤始攄對敷坑士卒乾沒費  
倉儲勢藉兵須用功無禮忽諸御鞍  
今驪裹宮硯玉蟾蜍拜舞銀鈎落恩  
波錦帕舒此行非不濟良友昔相於  
去掉依顏色沿流想疾徐沈綿疲井  
臼倚薄似樵漁乞米煩佳客鈔詩聽  
小胥杜陵斜晚照滴水帶

寒淤莫話清谿髮蕭蕭白映梳

送盧十四弟侍御護韋尚書靈輓歸上

都二十韻

杜甫

素幕渡江遠朱幡登陸微悲鳴駟馬  
顧失涕萬人揮參佐哭辭畢門闌誰  
送歸從公伏事久之子俊才稀長路  
更執紼此心猶倒衣感恩義不  
小懷舊禮無違墓待龍驤詔臺迎  
獬豸威深裏見士則雅論在兵機  
戎狄乘妖氣塵沙洛禁闈往年朝謁  
斷他日掃除非但促銅壺箭休添玉



帳旂動詢黃閣老肯慮白登圍萬姓瘡痍合羣  
兇嗜慾肥刺規多諫諍端拱自光輝儉約前王  
體風流後代稀對歎期特達衰朽再芳菲空裏  
愁書字山中疾探薇撥杯要忽罷抱被宿何依  
眼冷看征蓋兒扶立釣磯清霜洞庭葉故就別  
時飛

送僧

張謂

童子學脩道誦經求出家手持貝多葉心念優  
曇花得度北州近隨緣東路賒一身求清淨百  
毳納袈裟鍾嶺更飛錫爐峰期結跏深心大海  
水廣願恒河沙此去不堪別彼行安可涯殷勤  
結香火來世上牛車

送李賓客荆南迎親

獨孤及

宗室劉中壘文場謝客兒當爲天北斗曾使海  
西陲毛節精誠著銅樓羽翼施還申供帳別言  
赴倚門期恩渥霑行李晨昏在路岐君親兩報  
遂不敢議傷離

送史司馬赴崔相八幕

一作岑參詩



無名氏

崢嶸丞相府清切鳳凰池  
羨爾瑤池鶴高棲瓊  
樹枝歸飛晴日好吟弄  
惠風吹正有乘軒樂初  
當學舞時珍禽在羅網  
微命若遊絲願托周周  
羽相銜漢水湄

送薛大夫和蕃

無名氏

戎王歸漢命魏絳諭皇恩  
旌旆辭雙闕風沙上  
五原往途遵塞道出祖耀  
都門策令天文盛宣  
威使者尊澄波看四海  
人貢佇諸蕃秋杪連迴

騎無勞在夢魂

送戴三徵君還谷口舊居 釋理瑩

巖穴多遺秀弓車屢遠招  
周王尊渭叟潁客傲  
唐堯出處天波洽關河地  
勢遙瞻星吳郡夜作  
霧華山朝清論虛重席閑  
居掛一瓢漁歌思坐  
酌宸渥寵行軺春爲荷裳  
煖霜因葛履消層崖  
懸瀑溜萬壑振清颺谷鳥  
猶遷木場駒正食苗  
謝安何日起台鼎佇君調

送男彥輔左貶

林氏



他日初投杼勤王在隱兵有辭期不罰積意許  
相仍謫宦今何在銜冤猶未勝天涯分越徼驟  
騎速毗陵腸斷腹非苦書傳寫豈能淚添江水  
遠心劇海雲蒸明月珠難識甘泉賦可稱但將  
忠報主何懼點青蠅

期遇

與蘇盧二負外期遊方丈寺而蘇不至

因有是作

一作王昌齡詩

王維

共仰頭陀行能忘世諦情迴看雙鳳闕相去一

牛鳴法向空林說心隨寶地平手巾花氎淨香  
帔道畦成聞道邀同舍相期宿化城安知不來  
往翻得似無生

上巳日澗南園期王山人陳七諸公不

至

孟浩然

搖艇候明發花源弄晚春在山還綺季臨漢憶  
荀陳上巳期三月浮杯興十旬坐歌空有待行  
樂恨無鄰日晚蘭亭北煙開曲水濱浴蠶逢姹  
女采艾值幽人石壁堪題序沙場好解神羣公



望不至虛擲此芳晨

鄭駙馬池臺喜遇鄭廣文同飲

杜甫

不謂生戎馬何知共酒杯  
燃臍郿塢敗握節漢臣回  
白髮千莖雪丹心一寸灰  
別離經死地披寫忽登臺  
重對秦簫發俱過阮宅來  
醉留春夜舞淚落強徊徘徊

盛唐彙詩卷第一百

盛唐彙詩百字

盛唐彙詩卷第一百一

四唐彙詩一百七十一

新都 吳勉學 編輯

江晏如 校訂

五言排律

行邁

巡省途次上黨舊宮賦

并序

玄宗

朕昔在初九佐貳此州未遇扶搖之力空俟  
海沂之詠洎大橫入兆出處斯易一揮寶劍  
遽復瑤圖承歷數而順謳謠看天衣而御區



夏嗟乎向時沈默駕四馬而朝京師今日逍  
遙乘六龍而問風俗爰因巡省途次舊居山  
川宛然人事無間忽其昇華周遊館宇觸目  
依然雖迹異漢皇而地如豐邑擊筑慷慨酌  
桂留連空想大風題茲短什

三千初擊浪九萬欲搏空天地猶驚否陰陽始  
遇蒙存貞期歷試佐貳佇昭融多謝時康理良  
慙實賴功長懷問鼎氣夙負拔山雄不學劉琨  
舞先歌漢祖風英髦旣包括豪傑自牢籠人事

一朝異謳歌四海同如何昔朱邸今此作離宮  
鴈沼澄瀾翠猿巖落照紅小山秋桂馥長坂舊  
蘭叢卽是淹留處乘歡樂未窮

幸鳳湯泉

玄宗

西狩觀周俗南山歷漢宮薦鮮知路近省歛覺  
年豐陰谷含神爨湯泉養聖功益齡仙井合愈  
疾醴源通不重鳴岐鳳誰矜陳寶雄願將無限  
澤霑沐衆心同

早度蒲關

玄宗



鍾鼓嚴更曙山河野望通鳴鑾下蒲坂飛旆入  
秦中地險關逾壯天平鎮尚雄春來津樹合月  
落成樓空馬色分朝景雞聲逐曉風所希常道  
泰非復候繡同

途經華嶽

玄宗

飭駕去京邑鳴鑾指洛川循途經太華廻蹕暫  
周旋翠嶠留斜影懸巖冒夕煙四方皆石壁土五  
位配金天彷彿看高掌依稀聽子先終當銘歲  
月從此記靈仙

銜命使日本國

朝衡

銜命將辭國非才忝侍臣天中戀明主海外憶  
慈親伏奏違金闕駢驂去玉津蓬萊鄉路遠若  
木故園鄰西望懷恩日東歸感義辰平生一寶  
劍留贈結交人

和僕射晉公扈從温湯

王維

天子幸新豐旌旗渭水東寒山天仗外温谷幔  
城中奠玉群仙座焚香大乙宮出遊逢牧馬罷  
獵見非熊上宰無爲化明時太古同靈芝三秀



紫陳粟萬箱紅王禮尊儒教天兵小戰功謀猷  
歸哲匠詞賦屬文宗司諫方無闕陳詩且未工  
長吟吉甫頌朝夕仰清風

曉行巴峽

王維

際曉投巴峽餘春憶帝京晴江一女浣朝日衆  
雞鳴水國舟中市山橋樹杪行登高萬井出眺  
迴一流明人作殊方語鶯爲故國聲賴多山水  
趣稍解別離情

早入滎陽界

王維

汎舟入滎澤茲邑乃雄藩河曲間閭隘川中煙  
火繁因人見風俗入境聞方言秋野田疇盛朝  
光市井喧漁商波上客雞犬岸傍村前路白雲  
外孤帆安可論

下瀨石

孟浩然

瀨石三百里沿洄千嶂間沸聲常浩浩洄勢亦  
潺潺跳沫魚龍沸垂藤猿狖攀榜人苦奔峭而  
我忘險艱放溜情深愜登艫目自閑瞑帆何處  
宿遙指落星灣



夜泊宣城界

孟浩然

西塞沿江島南陵問驛樓湖平津濟闊風止客  
帆收去去懷前事茫茫泛夕流石逢羅刹礙山  
泊敬亭幽火識梅根冶煙迷楊葉洲離家復水  
宿相伴賴沙鷗

行出東山望漢川

孟浩然

異縣非吾土連山盡綠篁平田出郭少盤坂入  
雲長萬壑歸於漢千峰劃彼蒼猿聲亂楚峽人  
語帶巴鄉石上攢椒樹藤間綴蜜房雪餘春未

煖嵐解晝初陽征馬疲登頓歸帆愛渺茫坐欣  
沿溜下信宿見維桑

赴彭州山行之作

高適

峭壁連崆峒攢峰疊翠微鳥聲堪駐馬林色可  
忘機怪石時侵徑輕蘿乍拂衣路長愁作客年  
老更思歸且悅巖巒勝寧嗟意緒違山行應未  
盡誰與玩芳菲

舟行入剡

崔顥

鳴棹下東陽回舟入剡鄉青山行不盡綠水去



何長地氣秋仍濕江風晚漸涼山梅猶作雨谿  
橘未知霜謝客文逾盛林公未可忘多慙越中  
好流恨閱時芳

遼西作

崔顥

燕郊芳歲晚殘雪凍邊城四月青草合遼陽春  
水生胡人征牧馬漢將日徵兵露重寶刀濕沙  
虛金鼓鳴寒衣着已盡春服與誰成寄語洛陽  
使爲傳邊塞情

巴丘春日作

張均

日出洞庭水春山挂斷霞江渚相映發卉木共  
紛華湘戍南浮澗荆關北望賒湖陰窺魍魎丘  
勢辨巴蛇島戶巢爲館漁人艇作家自憐心問  
影三歲客長沙

秦中守歲

儲光羲

衆星已窮次青帝方行春永感易成戚離居難  
重陳闔門守初夜燎火到清晨或念無生法多  
傷未出塵廣庭日將宴虛室自爲賓願以桑榆  
末常逢甲子新



越江秋曙

蕭穎士

扁舟東路遠，曉月下江濱。  
瀟灑信潮上，蒼茫孤嶼分。  
林聲寒動葉，水氣曙連雲。  
瞰日浪中出，榜歌天際聞。  
伯鸞常去國，安道惜離群。  
延首剡谿近，詠言懷數君。

登舟將適漢陽

杜甫

春宅棄汝去，秋帆催客歸。  
庭蔬尚在眼，浦浪已吹衣。  
生理飄蕩拙，有心遲暮違。  
中原戎馬盛，遠道素書稀。  
塞鴈與時集，檣烏終歲飛。  
鹿門自此

往永息漢陰機

過南嶽入洞庭湖

杜甫

洪波忽爭道，岸轉異江湖。  
鄂渚分雲樹，衡山引舳艫。  
翠牙穿裊蔣，碧節吐寒蒲。  
病渴身何去，春生力更無。  
壤童犁雨雪，漁屋架泥塗。  
欹側風帆滿，微冥水驛孤。  
悠悠迴赤壁，浩浩略蒼梧。  
帝子畱遺恨，曹公屈壯圖。  
聖朝光御極，殘孽駐艱虞。  
才淑隨厮養，名賢隱鍛鑪。  
邵平原入漢，張翰後歸吳。  
莫恠啼痕數，危檣逐夜烏。



大曆三年春白帝城放船出瞿塘峽久  
居夔府將適江陵漂泊有詩凡四十韻

杜甫

老向巴人裏今辭楚塞隅  
入舟翻不樂解纜獨  
長吁窄轉深啼狖虛隨亂浴鳧  
石苔凌几杖空  
翠撲肌膚疊壁排霜劔奔泉  
濺水珠杳冥藤上  
下濃淡樹榮枯神女峰娟妙  
昭君宅有無曲留  
明怨惜夢盡失歡娛擺闔盤  
渦沸歎斜激浪輸  
風雷纏地脉水雪曜天衢  
鹿角真走險狼頭如

跋胡惡灘寧變色高卧負微軀  
書史全傾撓裝  
囊半厭濡生涯臨臬兀死地  
脫斯須不有平川  
決焉知衆壑趨乾坤霾漲海  
雨露洗春蕪鷗鳥  
牽絲颺驪龍濯錦紆落霞沈  
綠綺殘月壞金樞  
泥筍苞初荻沙茸出小蒲  
鴈兒爭水馬燕子逐  
檣烏絕島容煙霧環洲納  
曉晡前聞辨陶牧轉  
眄拂宜都縣郭南畿好津  
亭北望孤勞心依憇  
息朗詠劃昭蘇意遣樂還  
笑衰迷賢與愚飄蕭  
將素髮汨沒聽洪鑪丘壑  
曾忘返文章敢自誣



此生遭聖代誰分哭窮途卧疾淹爲客蒙恩早  
廁儒廷爭酬造化樸直乞江湖濫瀕險相迫滄  
浪深可逾浮名尋已已嬾計却區區喜近天皇  
寺先披古畫圖應經帝子渚同泣舜蒼梧朝士  
兼戎服君王按湛盧旄頭初倣擾鶉首麗泥途  
甲卒身雖貴書生道固殊出塵皆野鶴歷塊匪  
駘駒伊呂終難降韓彭不易呼五雲高太甲六  
月曠搏扶回首黎元病爭權將帥誅山林託疲  
繭未必免崎嶇

北風

杜甫

春生南國瘴氣待北風蘇向晚霾殘日初宵鼓  
大鑪爽攜卑濕地聲拔洞庭湖萬里魚龍伏三  
更鳥獸呼滌除貪破浪愁絕付摧枯執熱沈沈  
在凌寒往往須且知寬疾肺不敢恨危塗再宿  
煩舟子衰容問僕夫今晨非盛怒便道卽長驅  
隱几看帆席雲山湧坐隅

南極

杜甫

南極青山衆西江白谷分古城踈落木荒樹密



金唐集詩 卷一百一  
寒雲歲月蛇常見風颯虎或聞近聲皆鳥道殊  
俗自人群睥睨登哀柝蝨弧照夕曛亂離多醉  
尉愁殺李將軍

東屯月夜

杜甫

抱疾漂萍老防邊舊穀屯春農親異俗歲月在  
衡門青女霜楓重黃牛峽水喧泥留虎鬪跡月  
挂客愁村喬木澄稀影輕雲倚細根數驚聞鵲  
噪暫睡想猿蹲日轉東方白風來北斗昏天寒  
不成寐無夢寄歸魂

春歸

杜甫

苔逕臨江竹茅簷覆地花別來頻甲子歸到忽  
春華倚杖看孤石傾壺就淺沙遠鷗浮水靜輕  
燕受風斜世路雖多梗吾生亦有涯此身醒復  
醉乘興卽歸家

到村

杜甫

碧澗雖多雨秋沙先少泥蛟龍引子過荷芰逐  
花低老去參戎幕歸來散馬蹄稻梁須就列榛  
草卽相迷蕃積思江漢頑踈感町畦暫酬知己



分還入故林栖

古跡

月夜金陵懷古

李白

蒼蒼金陵月空懸帝王州天文列宿在霸業大江流淶水絕馳道青松摧古丘臺傾頰鵲觀宮沒鳳凰樓別殿悲清暑芳園罷樂遊一聞歌玉樹蕭瑟後庭秋

過四皓墓

李白

我行至商洛幽獨訪神仙園綺復安在雲蘿尚

宛然荒涼千古跡蕪沒四墳連伊昔鍊金鼎何年閉玉泉隴寒惟有月松古漸無煙木魅風號去山精雨嘯旋紫芝高詠罷青史舊名傳今日併如此哀哉信可憐

行次昭陵

杜甫

舊俗疲庸主羣雄問獨夫讖歸龍鳳質威定虎狼都天屬尊堯典神功協禹謨風雲隨絕足日月繼高衢文物多師古朝廷半老儒直詞寧戮辱賢路不崎嶇往者災猶降蒼生喘未蘇指麾



安率土蕩滌撫洪爐壯士悲陵邑幽人拜鼎湖  
玉衣晨自舉鐵馬汗常趨松柏瞻虛殿塵沙立  
暝途寂寥開國日流恨滿山隅

重經昭陵

杜甫

草昧英雄起謳歌歷數歸風塵三尺劔社稷一  
戎衣翼亮貞文德丕承戢武威聖圖天廣大宗  
祀日光輝陵寢盤空曲熊羆守翠微再窺松柏  
路還見五雲飛

謁先主廟

杜甫

慘淡風雲會乘時各有人力侔分社稷志屈偃  
經綸復漢留長策中原仗老臣雜耕心未已歐  
血事酸辛霸氣西南歇雄圖曆數屯錦江元過  
楚劔閣復通秦舊俗存祠廟空山泣鬼神虛簷  
交鳥道枯木半龍鱗竹送清谿月苔移玉座春  
閭閻兒女換歌舞歲時新絕域歸舟遠荒城繫  
馬頻如何對搖落况乃久風塵孰與關張並功  
臨耿鄧親應天才不小得士契無鄰遲暮堪帷  
幄飄零且釣緡向來憂國淚寂寞灑衣巾



冬三日落城北謁玄元皇帝廟 杜甫  
配極玄都闕憑高禁籞長守祧嚴具禮掌節鎮  
非常碧瓦初寒外金莖一氣旁山河扶繡戶日  
月近雕梁仙李盤根大猗蘭奕葉光世家遺舊  
史道德付今王畫手看前輩吳生遠擅場森羅  
移池軸妙絕動宮牆五聖聯龍袞千官列鴈行  
寘旒俱秀發旌旆盡飛揚翠栢深留景紅梨迴  
得霜風箏吹玉柱露井凍銀牀身退甲周室經  
傳拱漢皇谷神如不死養拙更何鄉

諸葛廟

杜甫

久遊巴子國屢入武侯祠竹日斜虛寢谿風滿  
薄帷君臣當共濟賢聖亦同時羽戴歸先主并  
吞更出師蟲蛇穿畫壁巫覡醉蛛絲歛憶吟梁  
甫躬耕起未遲

謁禹廟

徐浩

猷澮敷四海川源滌九州旣膺土姓錫乃建洪  
範疇鼎革固天啓運興匪人謀肇開宅土業永  
庇昏執憂山足靈廟在門前清鏡流象筵陳玉



帛容衛儼戈矛探穴圖書朽卑宮堂殿脩梅梁  
今不壞松栢古仍留負責故鄉近竭來申俎羞  
爲魚知造化歎鳳仰徽猷不復聞夏樂唯餘奏  
楚幽婆娑非舞羽鏗鞀異鳴球盛德吾無間高  
功誰與儔災淫破凶慝祚聖擁神休出谷鸞初  
語空山猿獨愁春暉生草樹柳色暝汀洲恩貸  
題輿重榮殊衣錦遊宦情同械繫生理任桴浮  
地極臨滄海天遙過斗牛精誠如可諒他日寄  
冥搜

辟陽城

高適

荒城在高岸凌眺俯清淇傳道漢天子而封審  
食其奸淫且不戮茅土孰云宜何得英雄主返  
令兒女欺母儀良已失臣節豈如斯太息一朝  
事乃令人所嗤



盛唐彙詩卷第一百一

四唐彙詩二百七十一

盛唐彙詩二百七十一





